

Ndwencieng daengz lo!



Gvaq Ndwencieng

过春节

贵港市覃塘区蒙公乡高占小学六(1)班 韦昌昊

Ciet ndwencieng, lwgnyez ceiq angqyangz, bouxlaux ceiq nyaengq. Aenvih lwgnyez ndaej daenj buhvaq moq caeuq haiz moq, lij ndaej cuengq lwgbauq yiengj baba, ceiq sim' angq dwg sou ndaej cienzlok. Bouxlaux ne, nyaengq raixcaix, bwh gigwn gvaq cieng, suek faengx, nem doiq, baetbaet swiqswiq youh uetuet, dawz aenranz ndawndaw rogrog cungj baet ndaej seuqsatsat bae.

Haemhndaep, daengx ranz vunz naengh youq henz daiz, vuenvuen

heijheij gwn caeuzndaep. Nohgaeq, nohbit, nohmou, nohyiengz daengj baij rim daiz, siengj gwn gijmaz couh nip gijmaz. Daihgya miz gangj miz riu, geijlai nauhyied ha! Gwn caeuz gvaq le, gwnz daiz youh baij rim diengzdiengz bingjbingj, lwgmak caeuq cehgva, mwngz siengj gwn gijmaz couh gag au daeuj gwn. Daxgoeng daxbuz naengh youq ndaw ding itmienh gwn lwgmak itmienh yawj densi ndwencieng vanjvei, daxboh daxmeh caeuq daxau mehsimj youq gwnz laeuz gyaet cehgva dwk bej, lwgnyez ne, ceiq angq lo, guh gijmaz bouxlaux cungj mbouj

gvaic, gou caeuq daegnuengx yaep ndeu bae rog cit lwgbauq, yaep ndeu buet hwnj buet roengz, gyaep bae gyaep dauq, hemqyaya, daengx ranz goenjho, hoenghdwddwd.

Daengz gyanghwnz 12 diemj cung lo, ndaw mbanj ranzranz cungj diemj lab baij mbabwt dajbaiq, gouz youq ndaw bi moq daihfat daihvuengh, ndangdaej cangq. Baiq gvaq le, gak ranz couh gag youq gwnz dingjlaeuz swheij cuengq bauq. Yawj, gij bauqva youq gyangmbwn hai va, hoengzhoengz loegloeg, lumj baenz aen baenz aen liengjva hung nei,

mbienj neix roengzbae le, mbiengj haenx youh hwnjdaej, mbouj dingz mbouj duenh, gyangmbwn lumj hai va nei, geijlai ndeyawj ha!

Haet coit, daihgya raen naj cungj naeuz goengheij goengheij. Gou bae goengheij daxgoeng daxbuz ndangcangq, daxgoeng daxbuz riu-nyumj dwk hawj gou hoengzbae hung. Gou youh daj daxboh daxmeh daxau mehsimj gizhaenx ndaej daengz haujlai cienzlok, caen haisim ha!

Ngoenz co' ngeih daengz ngoenz coroek, gou caeuq daxmeh bae ranz mehdaiq ha, gaen daxbuz bae mbanj ha, miz bouxhek daeuj ranz gou ha, gaen daxboh bae yawj dwkgiuz ha, ngoenzngoenz cungj gvaq ndaej angqfwngfwng, aensim gou caen dwg angq ndaej beij gwn diengz lij diemz ha!

Ndwencieng saedcaih dwg saedceij vuenyungz angqyangz, gou maqmuengh saedceij baenaj hix gvaq ndaej vuenyungz angqyangz!

(指导老师:覃珍团)

Gyaujswj Gimngaenz

金元饺

Ngoenzndaep lajbyongh-ngoenz, daxmeh bau gyaujswj, de itmienh bau itmienh angqvauvau naeuz: "Gou dawz maenz ngaenz-dih neix bau haeujbae, couh baenz aen gyaujswj gimngaenz ndeu lo. Byawz gwn daengz, bimoq couh ndaej fatcaiz lo."

Gou byaengq da yawj aen gyaujswj gimngaenz neix, siengj ok aen cawjeiq ndeu. Gou youq aen gyaujswj gok ndeu yungh rengz nyaen aen geiqhauh ndeu, gag siengj: Yawjdaej aen gyaujswj gimngaenz neix itdingh haeuj gou lo.

Gyaujswj roengz rek lo, daxmeh yungh aensieg youq ndaw rek menhmenh hoed, gyaujswj hausagsag couh lumj baenz duz baenz duz bya doenghyubyub, youq ndaw raemx youz bae youz dauq. Yaepyet, aen gyaujswj gimngaenz mbouj raen lo. Gou

gag siengj: Mbouj youqgaenj, fanjcingq gou guh geiqhauh lo, haengjdingh ra ndaej raen. Gyaujswj youq ndaw rek cawj yaep ndeu, gou fwt raen aendungx gyaujswj gawh hung lo. Cuet lo! Laxlawz gyaujswj cawj le couh gawh hung, yienghneix gij geiqhauh gou guh haenx lij raen mbouj raen ne? Gou gag siengj le, youh gag nai swheij: Mbouj youqgaenj, mwh gwn gou couh gwn lai di, gou mbouj saenq gou gwn mbouj daengz.

Gyaujswj daek hwnj daiz, gou gyajcang dungx gig iek, sing hung hemq: "Meh, mwngz daek hawj gou lai di." Daxmeh aj bak hung, doeksaet yawj dwk gou, mwngz mbouj rox, bingzseiz gou gwn gig noix. Gou gwj gwn gwj gwn, gwn dwk aendungx cungj bengq liux lo, cungj mbouj raen aen gyaujswj gimngaenz. Daxboh



daxmeh hix gwn imq lo, aen gyaujswj gimngaenz lij mbouj raen. Ndaw buenz cij miz geij aen gyaujswj lo, gou dawz dawh daeuj baez aen baez aen baek byoengq bae, vanzlij mbouj raen maenz ngaenzdih. Gvaic lo, nanzdauh gyaujswj gimngaenz maj fwed mbin bae lo?

Gou mbouj gamsim, youh bae yawj aen rek cawj gyaujswj haenx. Yi, ndaw rek lij miz benq naeng gyaujswj ndeu, gou au aensieg daeuj vez, hai, dwg maenz ngaenzdih ninz youq daej rek, laxlawz dwg gyaujswj cawj yungz lo!

(ngeih nienzgaep Cangh Gyahyz)

Caeg Gwn "Sezbiz"

偷喝“雪碧”

Gou yawjraen daxboh dawz bingz sezbiz daeuj rwed va, hozndat dwk naeuz: "Bingzseiz gou yaek gwn sezbiz, mwngz cij hawj gou gwn gaemz iq ndeu, seizneix mwngz hawj gova gwn baenz lai, mwngz mbouj gyaenz gou lo!" Daxboh riu naeuz: "Doenghgo bingzseiz cungj dwg gwn raemx gyoet, hix hawj de gwn di 'yinliu' ba."

Gvaq yaep ndeu, gou yawjraen bingz "sezbiz" haenx cuengq youq gokciengz, couh ganjgip byaij gvaqbae dawz daeuj gwn. "Aeya, baenzlawz dwg raemxgyoet ha?" Gou sing hung hemq hwnjdaej. Daxbah daj ndaw rug byaij okdaej, sing hung riuhaha. Siengj daengz haxbaenh daxboh riu ndaej gig saenzmaed haenx, gou cij fwt rox, daxboh dwg yaeuh gou.

(ngeih nienzgaep Liuz Yizcwngz)



Denbinghsiengh Ranz Gou

我家的电冰箱

贵港市覃塘区蒙公乡高占小学五(1)班 雷国炳



Ranz gou miz aen denbingh- siengh ndeu, aen denbingh- siengh neix dwg gou caet bi seiz cawx ma, daengz seizneix gaenq ndaej sam bi lo.

Aen denbinghsiengh neix gwnz

dingj miz aen bingzdaiz ndeu, ndaej cuengq doxgaiq, aen bingzdaiz seiqhenz miz veizlanz, yienghneix doxgaiq couh mbouj yungzheih doek okdaej lo. Youq cingqmienh denbinghsiengh, miz aen baiz ndeu, baihgwnz sij miz cihmeh "Haier". Youq aenbaiz baihgvas diep miz mbaw biuj yungh dien ndeu. Mbawbiuj baihgwnz miz mbaw doz song boux lwgsai iq ndeu, miz lwg ndeu dawz fwngz dap youq gwnz mbaq lingh lwg bae, lumj naeuz: "Aen denbinghsiengh neix caen ndei ha." Lingh lwg ndeu

ndaw fwngz gaem aen giuzsiet ndeu, lumj naeuz: "Giuzsiet youq ndaw denbinghsiengh mbouj lau yungz bw!"

Denbinghsiengh ranz gou miz song caengz, caengz gwnz dwg cuengq gij gwn haemqvaiq gwn haenx. Caengz gwnz baihdaw miz seiq gyaeg. Gyaeg laj dwg aen hab ndeu, ndaej yungh fwngz rag okdaej, lingh sam gyaeg ndaej diuz sangdaemq dohcaep. Aendou caengz gwnz baihdaw hix miz sam gyaeg, ndaej cuengq gyaeggaeq, doenghgiy bingz haemq sang haenx daengj. Caengz laj dwg

caengz cuengq gijgwn cuengq haemq nanz haenx caeuq cuengq sietdiuz, binghgizlinz daengj. Baihdaw miz sam gyaeg, moix gyaeg cungj dwg aen hab ndeu, yaek cuengq doxgaiq caeuq au doxgaiq couh rag okdaej.

Denbinghsiengh ranz gou lij ndaej diuz dohcaep, ceiqilai ndaej diuz haj dangj, seizzah ndaej diuz dohcaep daemq di, seizdoeng ndaej diuz dohcaep sang di.

Neix couhdwg denbinghsiengh ranz gou. De dwg bangfwngz ndei ranz gou!

(指导老师 覃红梅)